

E TACHE LA TIERCE EDIZION DE SCUELE DI AVOST
Trê dîs di formazion pai insegnants a Aplis di Davâr

Al è dut pront pe tierce edizion de **Scuele di Avost**, il percors di formazion par insegnants di lenghe furlane che si davuelzarà a **Aplis di Davâr dai 26 ai 28 di Avost**. A inmaneâ dut al è il Docuscuele, centri regjonâl di documentazion ricercje e sperimentazion didattiche pe scuele furlane, servizi de **Societât Filologjiche Furlane** dal dut dedicât al insegnament de marilenghe a scuele cu la poie de regjon autonome Friûl Vignesie Julie. Il cors di trê dîs al è increditât dal Uffici Scolastic Regjonâl daûr des Liniis Vuide MIUR 2016-2019 e al è un moment une vore impuartant di cressite e di confront pai docents di ducj i ordins des scuele dal teritori di lenghe furlane. L'argument di cheste tierce edizion, ispirât dal puest dulà che si ten e di ce che al è sucedût ca a Otubar dal an passât, al è **Paisaç ambient e teritori** cu la cussience che nô par prins o vin di cognossi ce che o vin ator par capî i cambiaments in vore. La sientificitât dai contignûts e de metodologjie didattiche nus ven garantide de colaborazion strente cu la Universitât dai studis di Udin, presinte cun dut il grup di lavôr dal setôr disciplinâr di gjeografie dal dipartiment di Lenghis e leterature, comunicazion, formazion e societât. L'alternâsi di leziions frontâls e laboratoris al permetarà di svicinâsi al argument di un pont di viste gjeografic, leterari, antropologjic, climatic e ancje dal pont di viste dal zûc, de tecnologjie, de esperience, des technichis teatrâls o artistichis, misclîçant cognossince e creativitât intune ricete che e vûl alimentâ, come simpri, la cussience des oportunitâts infinidis dal insegnament dal furlan a scuele. Il teme di chest an, cun di plui, nus permet di inmaneâ une taule taronde sul teme de educazion a cîl viert: miercus ai 28 di Avost si laran a cognossi ben i concets di scuele tal viert, asîl tal bosc e dal mâr cun esperts formadôrs in cjamp nazionâl e cu lis testimonieancis dai istitûts che tal nestri teritori a àn za tacât o a stan sperimentant progjets didattics vierts a cheste gnove esigjence di puartâ indenant la scuele adun cul teritori. Dut il program al è sul sît www.scuelefurlane.it, dulà che si cjate la schede par iscrivisi dentri dai 20 di Avost, o su la pagine facebook dal Docuscuele.